

À l'altru mondu, u tempu hè longu, ci stà l'eternità
È m'hà pigliatu à tempu natu ; di mè, chì n'hà da fà
O cara mamma, u paradisu hè grande cume tè
È s'eo ti chjamu à l'improvisu s'arricummanda à mè
Santa Maria a to sumiglia ùn mi lascia più
È mi cuntentu è mi ramentu, cume s'ell'era tù

Ti mandu un fiore, u so culore, u sceglierai tù
Hè ind'è u pratu di u Muratu ch'ellu face u più
S'eo fussi eiu frà i più belli u cuglierebbi à tè
Ma sò in celu, è i to capelli sò luntanu da mè
Ma i t'allisciu cù Ghjesù Cristu chì sà quale tù sì
È mi cuntentu è mi ramentu, è megliu ùn possu dì

Ùn piglià dolu, u to figliolu cù l'ànghjuli stà bè
È ciò ch'o vogliu, u mio custodiu a sà prima chè mè
Quì l'aria fine cume puntine cosge senza piantà
Ore tranquille, à mille à mille, senza calamità
À l'altru mondu, canta un culombu è paura ùn hà
Per cacciadore ci hè u Signore, O Mà ùn ti ne fà